

De Karkhoff bi de Olde Toorn

Karkhoff sall vertellen van fraugere Tieden un van ein lüttjet Eiland mit sien Mensken

BORKUM/jan - Borkumer Bedrieven bin upstünd mit hör flietege Helpers up de olde reformeierde Karkhoff bi de Olde Toorn an't knaunen un wuracken, umdat hier ein skiere un moje Stee komen sall. Siet Jahrhunderten was hier de Midde van't Eiland. In de Karke hett de Pestoor de Lüttjen döpt un hier funnen de Börkumers hör Grafftstee, uk as de Dod wiet weg van tau Huus kwamm.



De leege Müre an de Westsiet sall so groot wesen as de Karke ut dat 15de Jahrhundert.
Foto: G. Ulsamer

De Mester Dr. Linke hett all um 1953 na de fraugere Karken söcht un verleden Jahr was de Archäologe Michael Krecher mit sien Lü heil deip in de Grund un hett sekür nawesen, dat all in dat 13. Jahrhundert Mensken hör Hunk up't Eilandje harrn. De Heimatverein hett de Olde Toorn un de Karkhoff in sien Hannen nomen, umdat old Borkum neit in't Vergetelbauk kummt.

Ein leege Müre an de Westsiet van de Toorn sall so groot wesen as de Karke ut dat 15de Jahrhundert. Up de Grund liggen Mussels un grote Skilder vertellen van olde Tieden un Banken bin d'r tau utrüsten un tau kieken In't Süden van de Toorn komen de Grafftsteinen weer up de Karkhoff mit Verklaren ut hör Leven. Booms, Planten un Greunte sall ein moje Ankiek geven, nett as de Padjes ut Steinen. De Ingang sünder Trappen is an de Noordsiet.

Stillte un Freede sall up de Karkhoff bi de Olde Toorn wesen, man disse Stee sall uk vertellen van fraugere Tieden un van ein lüttjet Eiland mit sien Mensken.